

Comisiwn Cydraddoldeb a Hawliau Dynol

Sut i gyfrifo

gwerth hawliad

gwahaniaethu

Canllaw i feintoli hawliadau gwahaniaethu
mewn achosion mynediad i wasanaethau



Comisiwn
Cydraddoldeb a
Hawliau Dynol

Equality and
Human Rights
Commission

Cyd-destun ar gyfer y

canllaw hwn

Mae'r canllaw canlynol yn ceisio cynorthwyo unigolion i ddeall sut mae llys sirol yng Nghymru neu Loegr yn debygol o feintoli beth yw gwerth hawliad llwyddiannus am wahaniaethu. Mae'r canllaw hwn yn ffocysu ar y gwahaniaethu y gall pobl wynebu yn eu bywyd o ddydd i ddydd, er enghraifft, wrth siopa, ymweld â lleoliad (fel theatr, bwyty neu westy) neu debyg (achosion gwasanaethau). Gellid dilyn yr un egwyddorion mewn mathau eraill o achosion dan Ddeddf Cydraddoldeb 2010, megis hawliadau eiddo neu gyflogaeth.

Ymagwedd gyffredinol y llys

Mae faint fydd y llys yn ei ddyfarnu yn ddibynnol ar ffeithiau ac amgylchiadau pob achos unigol, a bydd y llys yn edrych ar y rhain yn ofalus.

Tra bydd ffeithiau pob achos yn wahanol, mae'r egwyddor fydd y llys yn ei ddilyn wrth benderfynu ar lefel dyfarniad iawndal yr un fath bob tro: bydd y llys yn ceisio rhoi'r hawlydd yn ôl yn yr un sefyllfa (i'r fath raddau ag sy'n bosibl) ag y byddai wedi bod pe na fyddai'r gwahaniaethu wedi digwydd.

Bydd hyn yn cynnwys swm o iawndal am niwed i deimladau a gall gynnwys unrhyw golled ariannol arall a wynebwyd o ganlyniad i'r gwahaniaethu dan sylw, er enghraifft, os gwrthodir mynediad i ddefnyddiwr cadair olwyn ar drên ac mae'n gorfod dal trên hwyrach gan deithio yn ystod oriau brig (a phrynu tocyn amser brig), bydd ganddo hawl i ddyfarniad ar gyfer niwed i deimladau ac am gost y tocyn amser brig. Mewn achosion eraill, dim ond gyfer niwed i deimladau y gwneir dyfarniad, er enghraifft, os yw siopwr yn gwrthod gwasanaeth i rywun oherwydd ei hil. Y nod yw talu iawndal am niwed gwirioneddol i deimladau nid i gosbi'r darparwr gwasanaeth.

Niwed i deimladau

Y raddfa Vento

Mae yna gryn dipyn o gyfraith achos (penderfyniadau blaenorol y llysoedd a thribiwnlysoedd) ynghylch y lefelau priodol o niwed o deimladau. Er nad oes terfyn ffurfiol ar faint all llys ei ddyfarnu, mae'r uwch lysoedd apêl wedi sefydlu amrediad o ddyfarniadau ar gyfer niwed i deimladau a elwir yn '**raddfa Vento**' (**Vento** yw enw'r achos a sefydlodd y raddfa).

Mae'r raddfa Vento wedi ei newid yn achlysurol i ystyried y raddfa chwyddiant; gwnaethpwyd y newid mwyaf diweddar ym Mawrth 2017. Ar hyn o bryd, mae yna dri band dyfarniad, fel a ganlyn:

Band is:

**£900 i
£8,600**

Band canol:

**£8,600 i
£25,700**

Band uwch:

**£25,700 i
£42,900**

Bydd y bandiau hyn yn cael eu hadolygu eto ym Mawrth 2019 gan Lywyddion y Tribiwnlys Cyflogaeth, ac yn flynyddol wedi hynny. Bydd unrhyw ganllaw newydd yn dod yn weithredol parthed hawliadau a gyflwynir ar neu wedi 6 Ebrill ym mhob blwyddyn. Gallwch wirio os oes yna unrhyw ganllaw newydd ar **wefan y Llysoedd a Thribiwnlysoedd**.

Pa fand o'r raddfa Vento sy'n berthnasol?

Yn achos y Vento, esboniodd y Llys Apêl y gwahaniaethau rhwng y tri band:

- Mae'r band is yn ymwneud ag 'achosion llai difrifol' ble mae'r weithred o wahaniaethu yn ddigwyddiad unigryw neu untro.
- Mae'r band canol yn ymwneud ag achosion difrifol nad ydynt yn syrthio o fewn y band uwch.
- Mae'r band uwch yn berthnasol i'r achosion mwyaf difrifol, er enghraifft, ble cafwyd ymgyrch faith o wahaniaethu ac/neu aflonyddu.

Yn y rhan fwyaf o'r achosion gwasanaethau, mae'r gwahaniaethu yn debygol o fod yn ddigwyddiad unigryw, ac mae'r dyfarniad yn debygol o fod yn y band is o £900 i £8,600. Mae'r band hwn yn eang, gan roi hyblygrwydd i'r llys i unioni'r iawndal yn unol â'r hyn sy'n deg a chyfiawn ym mhob achos. Bydd y llys yn ystyried yr holl dystiolaeth, yn cynnwys tystiolaeth yr hawliwr ynghylch effaith y gwahaniaethu arnynt, cyn penderfynu ar ddyfarniad priodol o fewn y band hwn.

Yn achos *Purves v Joydisc Ltd yn yr Alban* [2003 SLT (Sh Ct) 64], fe ystyriodd y llys ddyfarniad o niwed i deimladau ar gyfer digwyddiad unigryw. Dywedodd ffrind wrth ddyn dall, oedd wedi cael gwybod dros y ffôn, na fyddai ei gi tywys yn cael ei ganiatáu mewn bwyty. Dyfarnodd y llys £1,000 i'r hawliwr gan wneud y sylwadau canlynol:

- Bydd y gwahaniaethu yn cael ei ystyried i fod yn llai difrifol pe na fyddai wedi digwydd mewn lle cyhoeddus neu ym mhresenoldeb y person anabl (yn yr achos hwn, dywedwyd wrtho amdano gan ffrind).
- Fel arfer byddai ymddiheuriad y ffordd fwyaf effeithiol o liniaru difrifoldeb y gwahaniaethu. Yn yr achos *Purves*, nid oedd esboniad nac ymddiheuriad wedi ei gynnig o gwbl.
- Mae'r dyfarniad yn adferol heb fod yn gosb; mae'n gyffredinol debyg i'r ystod o ddyfarniadau mewn achosion anaf personol.
- Ni ddylai fod mor isel fel ei fod yn lleihau'r parch tuag bolisi'r ddeddfwriaeth.

Tra bod yr achos *Purves* yn achos anabledd penodol, ac wedi ei benderfynu cyn yr achos *Vento*, mae'n dal i fod yn offeryn defnyddiol ar gyfer meintoli.

Mae dyfarniadau ar gyfer mathau tebyg o achosion gwahaniaethu unigryw sydd wedi eu penderfynu'n fwy diweddar wedi bod ar oddeutu'r un lefel o ddyfarniad – er enghraifft, dyfarnodd llys £900 i fenyw anabl yn 2016, wedi gwrthod mynediad iddi i sba gyda'i chi tywys.

Yn achos *Howe v JD Wetherspoon* [(2CL01225)], a benderfynwyd yn 2015, gwrthodwyd mynediad i grŵp a oedd wedi mynychu'r Gynhadledd Teithwyr Gwyddelig flynyddol i'r bar Wetherspoon gerllaw. Llwyddont mewn achos gwahaniaethu ar sail hil a dyfarnodd y barnwr £3,000 yr un iddynt.

Wrth benderfynu ar y swm o £3,000, cymharodd y barnwr driniaeth yr hawlwr yn *Howe*, i driniaeth yr hawliwr yn *Kemeh v y Weinyddiaeth Amddiffyn* ([2014] EWCA Civ 9). Yn achos *Kemeh* cymeradwyodd y Llys Apêl ddyfarniad o £6,500 i'r hawliwr a oedd bod yn destun un sarhad hiliol unigol ble roedd yna nodweddion gwaethybol. Roedd y gwahaniaethu yn achos *Howe* hefyd yn un digwyddiad unigol o wahaniaethu ar sail hil ac felly nid oedd yr hawlwr wedi eu darbwyllo, ond nid oedd yna unrhyw nodweddion gwaethybol ac fe gasglodd y barnwr fod dyfarniad is yn briodol.

Beth fyddai'n cyfiawnhau dyfarniad uwch?

Tra bydd y llys yn asesu dyfarniad iawndal am niwed i deimladau mewn ffordd wrthrychol, bydd dehongliad ac adwaith unigol yr hawliwr yn ffactor bwysig i'r llys ystyried. Po fwyaf y bydd yr ymddygiad yn aflonyddu'r unigolyn, y mwyaf difrifol y bydd y llys yn debygol o ystyried y gwahaniaethu, a'r mwyaf y bydd y dyfarniad ar gyfer niwed i deimladau. Ble mae gweithred unigryw o wahaniaethu yn arbennig o ddarostyngol neu ddifrifol, ac mae'r dioddefwr yn dioddef goblygiadau difrifol o ganlyniad, gellid cyfiawnhau dyfarniad yn y bandiau uwch.

Fel arfer, bydd y llys angen tystiolaeth eithaf manwl ynghylch difrifoldeb yr achos cyn y byddai'n barod i ddyfarnu swm sylweddol uwch.

Gallai enghreifftiau gynnwys:

- Ble defnyddir iaith arbennig o anfoesgar neu ansensitif gan y sawl sy'n gwahaniaethu.
- Ble mae'r gwahaniaethu yn digwydd mewn lle cyhoeddus o flaen nifer o aelodau'r cyhoedd, ac felly mae'n fwy tebygol o gael ei ystyried i fod yn ddarostyngol.
- Ble mae'r mater yn ymwneud ag agwedd breifat neu bersonol o fywyd y dioddefwr, er enghraifft arferion perfedd person anabl gyda chlefyd Crohn, neu faterion yn ymwneud ag agweddau personol bywyd rhywiol y dioddefwr neu rannau o'i gorff.
- Ble mae'r dioddefwr gwahaniaethu yn dioddef o iselder neu'n mynd yn wael o ganlyniad i'r hyn a ddigwyddodd.

Yn achos 2009 *Allen v Royal Bank of Scotland* (7SE51122), nid oedd Mr Allen yn gallu defnyddio ei gangen leol am gyfnod hir oherwydd nad oedd yn hygyrch iddo fel defnyddiwr cadair olwyn. Roedd wedi ei gyfeirio at wasanaethau amgen a pheiriannau arian nad oedd yn gallu eu defnyddio, ac wedi derbyn gwasanaeth yn y stryd. Dyfarnwyd £6,500 iddo (yn bell o fewn y band canol *Vento* ar y pryd) ar y sail fod y gwahaniaethu wedi bod yn barhaus am gyfnod hir ac wedi achosi cywilydd.

Er bod rhai enghreifftiau o ddigwyddiadau unigol yn cael eu hystyried i fod yn ddigon difrifol i haeddu dyfarniad o fewn band canol y raddfa Vento, mae penderfyniadau blaenorol yn dangos fod y rhain yn dueddol o fod yn achosion cyflogaeth, ble mae yna berthynas fwy manwl nag sydd rhwng cwsmer a darparwr gwasanaeth. Fodd bynnag, nid oes rheol na all dyfarniad am niwed i deimladau mewn achos gwasanaethau fyth fod mewn band uwch. Bydd yn dibynnu bob tro ar ffeithiau ac amgylchiadau pob achos.

Sut mae profi niwed i deimladau?

Bydd casgliadau a wneir yn y llys mewn unrhyw achos yn seiliedig ar y dystiolaeth mae'n weld a chlywed ar ffurf dogfennau ac/neu dystiolaeth tystion. Yn gyffredinol, bydd y llys yn rhoi ystyriaeth i'r materion canlynol wrth benderfynu ar y mesur priodol o iawndal i ddyfarnu:

- Difrifoldeb y gwahaniaethu ei hun. Bydd ffactorau perthnasol yn cynnwys beth a ddwedwyd neu a wnaethpwyd, sut y'i dywedwyd neu gwnaethpwyd, p'un ai'n gyhoeddus neu'n breifat.
- Tystiolaeth y dioddefwr gwahaniaethu, yn cynnwys effaith y gwahaniaethu arno/arni.
- Unrhyw dystiolaeth feddygol o effaith y gwahaniaethu ar yr unigolyn.

Tystiolaeth y dioddefwr gwahaniaethu

Mae tystiolaeth y dioddefwr ynghylch effaith y gwahaniaethu ar ei deimladau a llesiant yn hynod bwysig. Ble mae dioddefwr yn gallu rhoi dirnadaeth i'r llys o sut yr achoswyd niwed i'w deimladau, gall hyn fod yn sail ar gyfer dyfarniad uwch. Gallai dirnadaeth o'r fath gynnwys:

- Sut gwnaeth y digwyddiad i'r unigolyn deimlo pan ddigwyddodd ac yn syth wedyn.
- Am ba hyd mae wedi effeithio arno.
- A yw wedi achosi iddo deimlo'n fwy gofidus am bethau penodol yn hytrach na theimlad cyffredinol o ofid neu siom.
- A yw wedi ei atal rhag gwneud pethau y byddai wedi gwneud fel arall, ac am ba hyd.

Efallai y bydd pobl wahanol wedi eu heffeithio mewn ffyrdd gwahanol, a bydd y llys yn ystyried hynny, ar yr amod ei fod yn fodlon nad yw'r dioddefwr wedi gorliwio ei dystiolaeth.

Gall unigolion ei chael yn anodd siarad am eu teimladau, a dylai'r llys ddangos cydymdeimlad o ran hyn, ond mae'n bwysig cofio mai dim ond ar sail y dystiolaeth sydd ar gael y gall y llys wneud penderfyniad, ac na all ddyfalu sut mae'r digwyddiad wedi effeithio'n bersonol ar yr unigolyn. Dim ond os oes ganddo ddarlun mor gyflawn â phosibl o'r digwyddiad a'i effaith y gall y llys benderfyni ar wir werth yr achos.

Tystiolaeth feddygol (ble fo'n briodol)

Yn gyffredinol, nid oes angen dystiolaeth feddygol oni bai fod y dioddefwr wedi datblygu symptomau o ganlyniad i'r gwahaniaethu, megis iselder; bydd yr unigolyn yn cael cyfle i ddweud wrth y llys yn uniongyrchol am hyn. Bydd hefyd yn helpu'r llys os oes dystiolaeth feddygol ategol ar gael; yn aml mae hyn yn ddim mwy na llythyr gan feddyg teulu yn disgrifio symptomau a thriniaeth feddygol yr unigolyn. Yn gyffredinol, po fwyaf difrifol y symptomau, y mwyaf o dystiolaeth fydd y llys eisiau ei weld cyn ystyried swm mwy sylweddol o iawndal. Efallai y bydd achosion difrifol yn galw am adroddiadau gan feddygon arbenigol yr unigolyn neu weithwyr iechyd proffesiynol eraill, a dylai'r rhain ddisgrifio unrhyw gyswllt rhwng y symptomau a'r weithred o wahaniaethu ei hun.

Cysylltiadau

Mae'r cyhoeddiad hwn ac adnoddau cydraddoldeb a hawliau dynol cysylltiedig ar gael ar wefan y Comisiwn: www.equalityhumanrights.com

I gael cyngor, gwybodaeth neu gyfarwyddyd ar gydraddoldeb, gwahaniaethu neu faterion hawliau dynol, cysylltwch, â'r **Gwasanaeth Cyngori a Chymorth Cydraddoldeb**, gwasanaeth sy'n annibynnol ac am d dim.

Gwefan	www.equalityadvisoryservice.com
Ffôn	0808 800 0082
Ffôn testun	0808 800 0084
Oriau	09:00 i 19:00 (Dydd Llun i ddydd Gwener) 10:00 i 14:00 (Dydd Sadwrn)
Post	LLINELL GYMORTH FREEPOST EASS FPN6521

Gellir cyfeirio unrhyw gwestiynau a sylwadau parthed y cyhoeddiad hwn at: correspondence@equalityhumanrights.com. Mae'r Comisiwn yn croesawu eich adborth.

Os ydych chi'n gynghorydd ac wedi cael ymholiad ynghylch cyfraith cydraddoldeb neu hawliau dynol, cysylltwch â **Chefnogaeth Cyngorwyr yr EHRC**:

Ffôn:



- Lloegr:** 0161 829 8190
- Yr Alban:** 0141 228 5990
- Cymru:** 029 2044 7790

E-bost:



- Englandadviserssupport@equalityhumanrights.com
- Scotlandadviserssupport@equalityhumanrights.com
- Walesadviserssupport@equalityhumanrights.com

Fformatau amgen

Mae'r cyhoeddiad yma hefyd ar gael ar ffurf ffeil Microsoft Word o www.equalityhumanrights.com

I gael gwybodaeth am fynediad un o gyhoeddiadau'r Comisiwn mewn fformat amgen, cysylltwch â: correspondence@equalityhumanrights.com

© 2018 Comisiwn Cydraddoldeb a Hawliau Dynol

Cyhoeddwyd: Ebrill 2018

ISBN: 978-1-84206-721-5

Gallwch lawrlwytho'r cyhoeddiad hwn yn

www.equalityhumanrights.com

© 2018 Comisiwn Cydraddoldeb a Hawliau Dynol

Cyhoeddwyd: Ebrill 2018

ISBN: 978-1-84206-721-5



Comisiwn
Cydraddoldeb a
Hawliau Dynol

Equality and
Human Rights
Commission